

洛陽縣志

重修洛陽縣志卷之十二

武進龔松林麀園編次

藝文

詔敕

詩餘

制

表

奏

疏

議

碑

贊

銘

名勝之區必有能文之士況在都畿舊地宣上德達
下情與夫四方之來遊者採覽所及因以寄其俯仰
上下感喟憑弔之思胥於斯文有賴較之他邑翰簡
所載有不倍蓰過之者與故或久湮之緒已陳之迹
杳失據依而轉因名流之一言以得有傳於後者殊

復不少搜擇之餘用以致廢興鑒得失固不止研鑿
往復之末節已也或者以文字目之嗤為無關政治
其猶不免俗吏之見也夫志藝文
藝文之一

詔敕

漢

武帝封周子南君詔

祭地冀州瞻望河洛巡省豫州觀於周室邈而無祀詢問
耆老邇得孽子嘉其封為周子南君以奉周祀

明帝祀明堂登靈臺詔

今令月吉日宗祀先武皇帝於明堂以配五帝禮備法物
樂和八音詠祉福舞功德其班時令赦羣后事畢升靈臺
望元氣吹時律觀物變羣僚藩輔宗室子孫衆郡奉計百
蠻貢職烏桓濊貊咸來助祭單于侍子骨都侯亦皆陪位
斯固聖祖功德之所致也朕以閭閻奉承大業親執圭璧
恭祀天地仰惟先帝受命中興撥亂反正以甯天下封奉
山建明堂立辟雍起靈臺恢宏大道被之八極而厚子無
成康之質羣臣無日旦之謀盥洗進爵跣蹻惟慙素性頑

鄙臨事益懼故君子坦蕩蕩小人長戚戚其令天下自殊
死已下謀反大逆皆除之百僚師尹其勉修厥職順行時
令敬若昊天以綏兆人

明帝幸辟雍初行養老禮詔

光武皇帝建三朝之禮而未及臨饗眇眇小子屬當聖業
間暮春吉辰初行大射令月元日復踐辟雍尊事三老兄
事三更安車輶輪供綬執授侯王設醬公卿饌珍朕親袒
割執爵而酌祝哽在前祝噎在後升歌鹿鳴下管新宮八
佾具備萬舞于庭朕聞薄德何以克當易陳負乘詩刺彼

已永念慙及無忘厥心三老李躬年耆壽明五更極榮授
朕尚書詩曰無德不報無言不酬其賜榮爵關內侯食邑
五千戶三老五更皆有二千石祿養終厥身其賜天下三
老酒人一石肉四十斤有司其存耆耄恤幼孤惠鰥寡稱
朕意焉

章帝白虎觀講議五經同異詔

蓋三代導人教學為本漢承暴秦廢黜儒術建立五經為
置博士其後學者精進雖曰承師亦別名家孝宣皇帝以
為去聖久遠學不厭博故遂立大小夏侯尚書後又立京

氏易至建武中復置顏氏嚴氏春秋大小戴禮博士此皆所以扶進微學尊廣道藝也中元元年詔書五經章句煩多議欲減省至永平元年長水校尉儵奏言先帝大崇當以時施行欲使諸儒共正經義頗令學者得以自助孔子曰學之不講是吾憂也又曰博學而篤志切問而近思仁在其中矣於戲其勉之哉於是下太常將大夫博士議郎郎官及諸生諸儒會白虎觀講議五經同異使五官中郎將魏應承制問侍中淳于恭奏帝親稱制臨決如者宣甘露石渠故事作白虎議奏

煬帝錄洛陽令王渙後詔

忠良之吏國家所以為理也求之甚勤得之至寡故孔子
曰才難不其然乎故洛陽令王渙秉清修之節蹈羔羊之
義盡心奉公務在惠民功業未遂不幸早世百姓追思為
之立祠自非忠愛之至孰能若斯者乎今以渙子石為郎
中以勸勞勤

安帝賜河南尹豹等詔

吾所以引納羣子置之學宮者實以方今承百王之敝時
俗淺薄巧偽滋生五經衰闕不有化導將遂陵遲故欲褒

崇聖道以匡失俗傳不云乎飽食終日無所用心難矣哉
今末世貴戚食祿之家溫衣美餽乘堅驅良而面牆失學
不識臧否斯故禍敗所從來也永平中四姓小侯皆令入
學所以矯俗勵薄反之忠孝先公既以武功書之竹帛兼
以文德教之子孫故能東修不觸羅網誠令兒曾上述祖
考休烈下念詔書本意則足矣其勉之哉

質帝移康陵在恭陵上詔

孝殤皇帝雖不永休祚而即位踰年君臣禮成孝安皇帝
承襲統業而前世遂令恭陵在康陵之上先後相踰失其

次序非所以奉宗廟之重垂無窮之制昔定公追正順祀
其令恭陵次康陵憲陵次恭陵臣序親秩為萬世法

三國魏

文帝改雒為洛詔

漢火行也火忌水故洛去水而加隹魏於行次為土土水
之壯也水得土而乃流土得水而柔故除隹加水變雒為
洛

陳留王止治道詔

吾乃當以十九日親祠而昨出已見治道得雨當復更治

徒棄功夫每念百姓力少役多夙夜存心道路但當期於
通利間乃撓撓老小務崇修飾疲困流離以至哀嘆吾嘗
安來此而行致馨德於宗廟邪自今以後明申勅之

北魏

世祖立太學詔

高祖德格兩儀明並日月博文教以懷遠人崇禮學以
後逸徙縣中區先宅天道總霜露之所均一吉卜于洛漢
戎繕兼興未遑儒教朕纂承鴻緒君臨寶歷思模聖規述
遵先志令天地清寧方隅無事可勅有司准訪前式置國

子立太學樹小學於西門

孝明帝定乾脯山以西為九京詔

神龜元年十二月辛未詔曰人生有終下歸北域京邑隱振口盈億萬貴賤攸憑未有定所今制乾脯山以西擬為九京

北周

孝閔帝以子謹為三老詔

樹以元首主乎教化率民孝悌置之仁壽是以古先明后咸若斯典立三老五更躬自袒割朕以眇身處茲南面何

敢遺此黃髮不加尊敬太傅燕國公謹執德淳固為國元老饋以乞言朝野所屬可為三老有司具禮擇日以聞

武帝令還長孫儉賜宅詔

故柱國鄆國公儉臨終審正爰吐德音以所居之宅本因上賜制度宏麗非諸子所居請以還官更遷他所昔叔教辭沃壤之地蕭何就窮僻之鄉以古方今無慙曩哲而有司未達大體遽以其第外給夫追善念功先王令典豈得遂其謙挹致乖懲勸令以本宅還其妻子俾清風遠播無替丰修

隋

煬帝建都詔

安安而能遷民用丕變是故姬邑兩周如武王之意殷人
五徙成湯后之業洛邑自古之都王畿之內天地之所合
陰陽之所和控以山河周以四塞水陸通貢陸等故漢祖
曰吾行天下多矣唯見洛陽成周墟堵弗堪葺宇今可於
伊洛營建東京設官分職以為民極也

唐

高宗改洛陽為東都詔

朕聞踐華固德百二稱乎建瓴卜洛歸仁七百崇乎定鼎
是以控膏腴於天府啓黃圖於渭濱襟沃壤於王城摘綠
宇於河渚市朝之城麗皇州之九緯丹紫之原邈神皋之
千里二京之盛其來自昔心茲宇宙通賦貢於四方交乎
風雨均朝宗於萬國曲阜之規猶勤測壘之地■豈得
宅帝之鄉獨稱都於西塞里王之邑匪建國於山川宜改
洛陽爲東都

穆宗以李源爲諫議大夫詔

昔盜起幽陵振蕩河洛贈太尉愷處難居首正色就死兩

河間風再固危壁殊節卓焉到今稱之源有曾參之行巢
父之操泊然無營汔此高年夫褒忠所以勸臣節也旌孝
所以激人倫也鎮澆浮莫如尚義厚風俗莫如尊老舉是
四者大儆於時其以源守諫議大夫賜緋魚袋河南尹遣
官敦諭上道

宋

太祖幸西京詔

建鼎洛邑我之西都燔柴秦壇國之大事况削平江表底
定南方推率土之混同自上天之鑒祐內慙涼德威是洪

休得不聲以恭虔申其告謝睭維京而西顧兆陽位於南郊豆籩陳有楚之儀黍稷奉惟馨之薦朕今暫幸西京有事于園邱宜令有司各揚其職禮容儀衛典故在焉祇事肅成無或煩擾諸道府不得以進奉為名輒有率歛凡在
中外當體予懷

仁宗賜河陽三城節度使同中書門下平章事判河

南府文彥博加恩告敕詔

歐陽修

朕因孟冬之吉辰饗太官而合食膺受神貺推行慶恩眷
惟同德之臣方處居留之任宜優異數以示眷懷既敷告